

# 曾國藩

## 日記

中册

廿九日

早飯後清理文件於見客一次核改信稿已刻見客  
 二張揚畏高生家久午劉毅科批稿段沈東信一件  
 中飯後與陸岑圍棋一局字沈弟密信港旗福勤  
 佑志福明強六字字未畢許信匪未久談約一冊半  
 於沈沈信字畢與洪某函論皖南事請其字信與  
 續先成劉三弟府一談接信知泰山已克壽劬  
 亦有可解圍之機存又與徽泉圍棋一局本日文件  
 於至劉閱畢其批札各稿則竟未及核辦核  
 閱甚多對之不能了也二更二點又與洪某函談  
 而門者多說話不多倦極睡不成寐三更四點稍寐  
 四更五點聞號哭之聲則陳氏妻病革其母痛哭  
 余起入內室省視遂已溘逝卅五月初一日寅刻也妻  
 自辛酉正月八日入門吾至九月間月產謹守規矩不為言  
 嘆內室有前院後院後院曾到過教次前院則終未至  
 呈跡至中庭<sup>處</sup>庭前為止自壬戌正月初三吐血浸常  
 咳嗽不止余早知其不久於世矣料理各事遂不復就  
 寢喜生庚子十二月初四日辰刻三月二十廿四

# 曾国藩日记

(中)

(清)曾国藩 著  
贾泓杰 王诚伟 整理



九州出版社  
JIUZHOU PRESS





同治元年壬戌岁

公元 1862 年

## 正 月

### 初一日

早起,赴万寿宫拜牌,辰初行礼毕;归公馆,各文武来贺。辰正早饭,饭毕又见客数次。早间大雾,辰刻放晴,巳初阴,巳正定晴。出外贺年,未初归公馆。天寒,至各处小坐。酉刻清理文件,雪琴来久谈。夜核改信稿,复江军门信一件。二更温《古文·奏议类》。三点睡,癯痒,竟夕爬搔,不能成寐。念养生之道莫大于眠食,眠不必甘寝鼾睡而后为佳,但能淡然无欲,旷然无累,闭目存神,虽不成寐,亦尚足以摄生。余多年不获美睡,当于此加之意而已。

### 初二日

早请客,先吃饭一碗。旋至眉生处小坐。辰正客来,即雪琴、少荃、子偲、海航、梅生诸人,巳正散。与柯小泉围棋一局,周荇农来久谈,清理文件。午刻与李眉生谈诗,极佩杜牧之之俊伟。未正至万簾轩处赴席。簾轩已病,少荃、申夫代为东家。筵宴过盛,灯后方散,归来倦甚。方子白来久谈。写零字颇多。二更后温古文奏议类。傍夕,折差王廷贵归来,即八月廿七日遣递恭慰大孝一折者也。夜登床,癯痒殊甚,三更后成寐。是日为酒食所困。余向来每日三饭,皆有一定时刻,本日失时,便尔大不适矣。

### 附 记

李朝斌 喻俊明 任星元 丁泗滨

### 初三日

是日拟赴黄陂夹为雪琴贺年。早饭后雪琴来面订,渠即先归。余约少荃、申夫、眉生同去。辰正起行,至东门外,积雪甚厚,无路可行,轿夫苦之。行五里许,即有大堤,堤上雪为风扫去,易于行,走二十里至黄陂夹。

雪琴款接殷勤，供张甚盛。未初中饭。饭后，雪琴与申夫、少荃等出外拜各营官，余在家少睡，与眉生鬯叙。傍夕与雪琴诸人谈，夜亦畅谈。二更后阅《古文·奏议类》。睡后左腿爬破，痛甚，彻夜不甚成寐。

#### 初四日

早起，与雪琴谈。旋少荃、申夫等皆起。早饭后至雪琴幕府，与诸友谈。坐舢板拜各营官。换坐长龙回家，午初至安庆公馆；见客三次。写家信一封。中饭后清理文件，接信，知徽休两军于廿六日在岩寺街获胜，粮路已通，为之欣慰。清理文件。申正，季弟自枞阳来贺年；渠于初二起程，中途搁浅，风雪苦寒，三日始到；谈至一更四点。二更清理文件，三点毕。睡后彻夜不能成寐，而癬不甚痒。

#### 初五日

早饭后见客三次，衙门期也。旋至眉生处坐，与少荃、虎臣等畅谈。午初清理文件。中饭办席，与季弟同饮。与柯小泉围棋一局。见客数次。与季弟畅谈。申正清理文件。傍夕少荃来畅谈。一更四点后，清理文件。二更三点睡，癬痒不甚成寐。是日接奉廷寄二道、谕旨一道，沈幼丹放江西巡抚，李辅堂放江西藩司。

#### 初六日

早饭后清理文件；勒少仲来小叙，洪琴西来久谈；陈虎臣、徐毅甫来，均久坐。改信稿三件。中饭后与少荃、眉生畅谈，清理文件。外出拜客数家，酉刻归。寒冷异常，懒于治事。夜清理文件，至二更二点未毕。温古文奏议类。日来癬痒异常，遍身若有芒刺者然，数夜不能成寐。本日尤不耐烦，因服脾汤一帖，睡后竟能酣睡，至五更方醒，近数月所未尝有也。傍夕接左季高信，知刘克庵廿六日大获胜仗，在济岭、大鰲岭一带。

#### 初七日

早饭后清理文件，旋至眉生处小坐，与筱泉围棋一局，见客四次；又洪琴西来谈一次，并带其友人吴绍烈、纘先等来见。写文任吾、周寿山信，又写左季高信，申正写毕。清理文件。见客二次。傍夕至眉生处久谈。夜清理文件，至二更三点止，尚未完毕。睡后三更癬痒殊甚，四更乃得甘寝。

### 初八日

是日为先祖星冈公冥诞，与季弟同备祭席行礼。饭后清理文件。与柯小泉围棋一局。与眉生论看地图之法。旋见客二次。又坐见者十余起。午正出城，至河下拜客，在周荇农处久坐。未初至马学使处赴席，申正归。改折稿一件，未毕。夜改一折一片，三更毕。睡颇成寐，五更醒，癖不甚痒。

### 初九日

早饭后核改一折二片，又自作近日军情片稿一件。见客五次。午正至李眉生处小坐。与程颖芝围棋一局，又观程与柯竹泉围棋一局。中饭请程柯二君及杨朴庵、吴纘先、洪琴西便饭，申初散。写对联、挂屏七件。李芋仙来久谈，傍夕接廷寄三件、谕旨一件，知彭雪琴开皖抚缺，以兵部侍郎候补，希庵调皖抚，严渭春调鄂抚，郑元善升河南抚。夜改折稿一件，二更毕。清理文件，至三更止，尚未完毕。睡后久不成寐，四更略成寐，五更复醒。

### 初十日

早饭后见客三次，衙门五十堂期也。旋又见他客四次，又观察泰暨洪琴西谈稍久。午正发报三折、四片。中饭后阅看公牍，渴睡昏昏。至眉生处，与莫子偲久谈。旋与季弟一谈。文件甚多，懒于清理。身若有病，不甚耐烦。傍夕与少荃一谈。夜不愿治事，与季弟闲谈，写零字太多，倒床小睡。二更三点睡，三更成寐。本日文件概未清理。前二日因办折奏，亦尚有未毕者，合之三日，积压不少矣。是日申刻接部文，颁到令箭十二支、令旗十二面、箭壶一个、架子一个、王命旗十道，缨杆俱全，牌十面，旗牌均有令字清汉文。旗以蓝缯为之，方二尺许，缯粗与夏布无异。旗杆用小竹、油硃为之，下有铁脚，上有油纸帽缀缨，均极草减，盖近来官物类偷减矣。令箭长五尺许，令旗黄缎为之，上用泥金写“江南钦差大臣、兵部尚书衔、两江总督”字样，上有黄绸方套一个、画龙黄油布套一个，略精整，不似王命旗之偷减。

### 十一日

辰起作恶，急欲呕吐，强忍得止，因不食早饭，亦不治事。饭后，季弟归去。绕室散步逍遥。辰正至眉生处一谈，与小泉围棋一局。旋清理文

件，见客四次，写郭筠仙、意诚信。中饭后吃素饭，全不吃菜，幸不果呕。饭后散步良久。申刻清理文件，至傍晚尚未毕。灯后，写零字数十。旋批江西布政详停止摊捐一案，头绪繁多，悉心研核，至三更批毕。余欲力戒州县不苛取民财，须令州县有为善之乐，故必尽革摊捐之款，使州县旷然无累，而后可与之更新。此案到已一月，迟回审慎，今始批定。

## 十二日

早饭后清理文件，见客四次。旋至眉生处小坐，与柯筱泉围棋一局。写左季高信一件。中饭后见客甚多，立见者七八次，坐见者二次。清理文件。毛寄云中丞所寄筠仙拟内江洋税章程折稿，细阅数遍，不甚了了。傍晚又与少荃、尚斋等畅谈。夜清理文件，至一更四点粗毕。倦甚，小睡。二更后阅上海地图，水道太多，殊难清晰。三点睡，不甚成寐，三更三点渐得甘寝。是日仍未食油荤。酉刻，接沅弟腊月十五日来信。

## 十三日

早饭见客五次，申夫与吴纘先谈较久。旋清理文件，至眉生处与筱泉围棋一局。中饭后见客三次，清理文件。傍晚至少荃处久谈。夜饭后又作呕吐，吐出清水数十口，作恶久之。唯在室中散步，逍遥至一更五点。清理文件，二更四点止，尚未完毕。睡不甚成寐。

## 十四日

早饭后见客三次。清理文件，写家信，沅甫一件、纪泽一件。泽儿寄会合诗一首来，颇有意境，因批圈寄回。信中属其熟读魏晋六朝中曹、阮、陶、谢、鲍、谢六家暨唐宋金朝李、杜、韩、白、苏、黄、陆、元八家之诗。与柯小泉围棋一局。中饭后写季弟信一，又写希庵信一。见客一次。与少荃等谈。清理文件。酉正，任祖父自京回，阅京报四十四本，多新政，颇慰人望。又至少荃、尚斋处畅谈。夜清理文件至二更二点止，温杜诗数十首；三点睡，颇成寐；五更后醒，不复成寐矣。

## 十五日

早，各员弁贺望贺节，见客纷纷，至巳正未毕。雪琴亦自黄陂夹前来庆酬，至午初止。倦甚，不复能见客，小睡片刻。清理文件。中饭后又见客二次。新到公牍甚多，略一翻阅，不能竟理。旋写扁、对联、条幅，至傍



夕毕。浏阳诸生邱庆吁等来此，令吹笙笛等为乐，余与莫子偲、李申夫、眉生、穆海航等听之。月色如昼，万里无云，与客细论时事，不知今年果有转机否，二更散。阅说文虫部，蝨蟲等部。四点睡，颇能成寐，五更醒。日内，思余近颇安逸，未尝点名、看操、查墙子，尽心于训练之事，又未尝阅生书，温经史，即书牘公文亦积压不少，深用自愧，又有室家之乐，不似往岁之躬尝艰苦，恐上行下效，风气日坏矣。

### 十六日

早饭后见客五次。有新任宁国府知府刘传祺自京来，庚戌庶常散馆，为刑部秋审处提调，坐谈稍久。至李眉生处久谈。与柯小泉围棋一局。清理文件。中饭后核改信稿约三十件，至傍晚夕毕。与尚斋论人才，条理清晰者，往往心地不甚质实。夜清理文件，至二更四点止，日内积压之件减去一半。睡颇能成寐。近来每三四更得甘寝，五更乃醒，癣痒亦略愈。

### 十七日

早饭后清理文件。辰正至李眉生处畅谈。已初接奉谕旨九道、廷寄一件。余以正月初一蒙恩以两江总督协办大学士。沅弟以正月初四日蒙恩，被授浙江按察使。无功无能，忝窃至此，实深惭惧。道喜之客甚多，直至未初，应酬粗毕。中饭后出城送周荇农之行，旋至东门看新葺之敬敷书院，酉初归寓。清理文件。傍晚夕与李眉生、方子白畅谈。夜清理文件，至三更止。睡不甚成寐。日内盼望上海信息殷忧迫切，不知何以久无确音。

### 十八日

早饭后清理文件。旋至眉生处畅谈。与筱泉围棋一局。见客十余次。潘馥自上海来，携有吴晓帆、潘季玉信函，问及洋人与长毛交战事，叙谈良久。赵惠甫自湖北来，亦与久谈。中饭后写左季高信一件，核改信稿数件。见客七八次，周荇农、李勉亭谈颇久。写沅弟信一件。傍晚夕与少荃、眉生等一谈。夜清理文件。李辅堂信中手折十余条，逐一批发，三更尚未完毕。睡后，三更三点成寐，五更初醒，癣痒少愈。

### 十九日

早饭后清理文件。旋加信四处，各一二片。辰初三刻开印行礼，礼毕，寓内文武来贺，外客皆辞谢。旋至眉生处畅谈。与小泉围棋一局。出

门拜客一家。归，雪琴来久叙。午刻小睡。未初请客，学使与司道数人便饭，雪琴亦在坐，申正散。倦甚，不能作事。酉正与眉生、伯符、尚斋、小泉诸人议余得协办应否辞让，商酌良久。夜清理文件。旋改复奏江浙军务折稿，至三更毕。是日申正酉初，写对联条幅八件、扁二付。夜不能成寐，似因用心太过之故。

## 廿日

早饭后见客三次，衙门期也。旋清理文件，改徽州战事折稿，又青阳战事片稿。午正，洪琴西来畅谈，观余午饭。饭后，改信稿三件。申刻少荃来，畅谈一时许。余亦至眉生等处，详论应否疏辞协办之命，众议以为宜受协办，而坚辞节制四省之权，不可同时并辞，近于矫情钓誉，灯时定计。夜作谢恩一件，又作密片一件，三更毕。睡不成寐，似因用心太过之故。

## 廿一日

早饭后清理文件。旋至眉生处，与筱泉围棋，尚未终局，接周弢甫信，买洋船一只，湾泊城下，欲余登船阅看定夺。其价已议定五万五千金。一委员朱筱山别驾押坐来皖，因与朱同登舟一看，无一物不工致。其用火激水转轮之处，仓卒不能得其要领。少荃、申夫、眉生等亦均往阅看。午初归，倦甚，小睡。未初请客，潘馥、刘传祺等便饭，申初三刻散去。折弁杨龙章自京师回，查阅京信。清理文件。与眉生、小泉等畅谈一次，又与尚斋论徽州平粟米一次。夜清理文件，至二更三点粗毕，而连日所到地方公牍多未打到。睡颇能成寐。

## 廿二日

早饭后清理文件。旋至眉生处小坐，与筱泉围棋一局。作夹片，言上海借洋兵助守事。见客二次，刘养素自江西来，坐颇久。中饭后见客二次，蒋嘉棫，号莼卿，系余请来作折奏者，坐颇久。清理文件。剃头一次。倦甚，傍夕小睡。夜阅杜牧之诗，写零字颇多。积压之件懒漫不欲清理。是日酉刻发报三折、三片、一清单，中有谢恩折，行九叩首礼拜发。夜接奉廷寄一件。

## 廿三日

早饭后清理文件。见客三次。写倭艮峰信一件、吴竹如信一件。与

柯小泉围棋一局。中饭后清理文件，见客二次，陈虎臣谈稍久，改信稿二件。傍夕与柯小泉、李眉生等商明日出题试书院甄别，因令幕府各拟一题，余择其一。写挂屏八幅。夜温《庄子》《肱箴》、《达生》等篇。二更三点睡，甚能成寐，亦可喜也。

#### 廿四日

早饭后写家信，澄弟一件、夫人一件。因报喜者索钱甚多，寄银百两。旋出门至杨朴庵处小坐。旋至忠义局观考试。敬敷书院举贡生监均准予考，四书题“古之贤士，何独不然，乐其道而忘人之势”，诗题“翰墨场中老伏波”。与首府陈心泉约，点名后在彼少候，而余到时，渠不少候，殊为恼怒。旋出城至李少荃处道喜，渠本日新移居营盘也。又至河下拜刘养素、蒋莼卿，午初归。至李眉生处小坐。清理文件，雪琴来久坐。中饭后习字一纸，见客二次。莫邵亭来，因同至眉生处，畅谈约一时许，灯后归。程伯敷出示洪稚存《上成亲王书》，即嘉庆己未获咎发遣新疆者。当时直声震于天下，今观之，亦无甚触忌讳之处。夜清理文件，至二更四点毕。是日早接奉廷寄，催令迅速奏事，知两宫皇太后盼望奏报，殷拳迫切，读之且感且悚。

#### 廿五日

早饭后见客三次，衙门期也。首府陈心泉，恶其失信，未与相见。旋至眉生处小叙。陈虎臣、洪琴西、钱调甫、杨朴庵等四次会晤，皆叙谈良久，已未初矣。请刘养素、蒋莼卿等便饭，申正散。倦甚，不能作事，复至眉生处。天气北风严寒。夜清理文件，写零字甚多。阅长江通商章程十二条，通共章程五条，不甚了了。清理文件，温元遗山诗。三更睡，颇能成寐。陈妾日内患病，本日服药略愈。

#### 廿六日

早饭后清理文件。旋见客四次，万簏轩坐颇久。与柯小泉围棋一局。中饭后作书复毛寄云，论夷税事件。写扁二件。将毛信稿细酌，至三更始行作毕，共约二千字。是日午刻，定刻门牌之式、团册之式，颇为用心。下半日稽核夷务，尤费钻索之功。用心太过，夜睡不能成寐。是日接奉廷寄一件。

## 廿七日

早饭后清理文件。因昨日用心太过，不敢办事。少荃来久谈，旋与同至柯小泉处一谈。会客二次。旋与尚斋围棋一局。午刻写希庵信一，核改信稿二件。中饭后倦甚，小睡。旋写对联八付。傍夕阅工匠修葺屋宇。夜清理文件，二更后温杜牧之律诗。三点后睡，酣眠至五更方醒。深以为慰。近日积压公牍甚多，又各处请代作谢恩折者，至八起之多，未能核改。又应行复奏之折数件，未能起草。昨日偶而用心太过，本日已昏倦，不能治事。精神之疲弱如此，责任之艰大如彼，殆无不颠踣之理，实深焦灼，不知何术可补救一二也。是日接奉廷寄一件，系因江浦、浦口克复，饬令进攻金陵。

## 廿八日

早饭后清理文件。旋至眉生处小坐，与柯小泉围棋一局。见客五次。将日内所到部文打到。中饭后又打到百余件。夜又打到百余件，尚未完毕。下半日见客三次，习字一纸。二更倦甚，即在位次小睡。三点后至上房。疮痒殊甚，手上诸疮作疼，颇为苦。睡后尚能成寐。是日酉刻至外一行，观长夫所修葺之客馆。傍夕接家信，系正月初五六澄弟等寄来者。

## 廿九日

早饭后清理文件。旋至眉生处与筱泉围棋一局。习字一张。见客五次，刘养素坐颇久。午正程颖芝来，与围棋一局。中饭后见客三次，丁日昌坐稍久。手上诸疮作疼，懒于治事。清理文件，至傍夕毕。夜倦甚，倒床小睡。二更后阅白香山诗。旋清理文件，三点毕。睡颇能成寐。是日接奉廷寄一件，系正月十八日所发者。

## 卅日

早饭后清理文件。旋见客四次。写左季高信一件。与眉生畅谈。与筱泉围棋一局。作复奏折，至灯初毕，约千七百字。旋清理文件，朗吟韩诗数十首。二更三点睡，因本日用心太过，彻夜不能成寐。

## 二 月

### 初一日

早间,各文武贺朔,至巳正方毕。与柯筱泉围棋一局。蒋莼卿搬入公馆。少荃来,鬯叙一切。午正因说话太多,倦甚。清理文件。午饭后,又见客三次。寓内修葺东北厅屋三间,余签押房将移于此,频往看视,亦因神怠不能治事,故聊尔消摇也。责任艰大,才智不称,精力日疲,可忧之至。夜清理文件。季弟信,言收降卒三千,请立大营,踌躇久之,不敢定计。公牒中所刻余官衔,字数太多,因删去十四字,令其另刻。戏题一绝云:“官儿尽大有何荣?字数太多看不清。删去几条重刻过,留将他日写铭旌。”温韩诗十余首。二更三点睡,酣眠至五更方醒,美睡也。

### 初二日

早饭后清理文件。至眉生处畅谈。与筱泉围棋一局。写官制军信一件。万簾轩来久谈,与之面定厘卡坐支章程。中饭后清理文件,写季弟信一件。旋写扁一方,写对联八付,戏仿近人陈曼生笔意。写毕,与眉生论古人作字之法,至灯时散。夜清理文件,二更毕。喉痛似有微热,因高声诵《诗经》各篇。三点睡,至四更三点方醒。近日每得美睡,虽两臂两手疮痛,而亦忘之,岂身体日佳耶?

### 初三日

早饭后清理文件。旋至眉生处谈。与筱泉围棋一局。见客一次,万簾轩、李申夫本日始履任,来谢也。巳正杨朴庵来。前考书院卷,请朴庵代为阅看,至是始阅毕送来,因与同阅数卷,评定甲乙,令人写榜,未初写毕。留朴庵在此便饭。饭后,喉痛殊甚。至眉生处小叙,仍尔不悻。申正登床竟睡,至暝方起,喉痛略愈。夜清理文件。写姚秋浦信一件。二更后喉痛,不能作事。三点睡,颇能成寐,至五更一点方醒。是日辰刻,行接诏礼,三跪九叩。因昨夜接奉十二月初八日上文宗显皇帝尊谥诏书也。午刻接奉廷寄一件。

### 初四日

早饭后清理文件。旋写家信一封。与柯小泉围棋一局。出门拜客,

万簾轩、李申夫两处道贺，至城外李少荃营，又至韩正国营、程学启营、李济元营、滕嗣林营，归寓已未初矣。中饭后喉痛，请潘姓医视。旋至上房小睡，喉痛不止。见客一次，赵惠甫坐颇久。酉刻后静坐，不作一事，喉痛略愈。夜清理文件，至二更二点毕。温杜诗五律，久读“用拙存吾道”二章。三点睡，甚能成寐。是日接信，鲍春霆放浙江提督，又知沅弟正月廿三日已至省城矣。

### 初五日

早饭后清理文件。见客二次，衙门期也。旋至眉生处，与筱泉围棋一局。接奉廷寄一件、谕旨六件，系因余正月十日发报批回，而原折竟未接到，殊不可解。谕旨屡次褒嘉，读之悚惧异常。写许仙屏信一件，约千余字。中饭后核改折稿三件，检点明日折差进京应备诸物，清理文件，至晡时毕。夜核改信稿四件，清理文件，至二更毕。温杜诗五律。上床时，右脚疮疼殊甚，呻吟不止。三更成寐，黎明方醒。本日喉痛已愈，服归脾汤一帖。

### 初六日

早饭后拜发题本，即登极贺表也。旋清理文件，写周子佩信一封，派曹恒德进京。接奉廷寄一件、谕旨二件，即昨日应接之批折，乃知军机处分作两日发还矣。与筱泉围棋一局。见客三次。清理文件。中饭后接张胜禄禀，言望城冈地太敞，河太窄，不便扎营。闻刘连捷已于初四日拔营，心以为忧，因手批止之，不知赶得及否，焦灼之至，恐沅弟将到未到之际而营中疏失也。清理文件，皆地方事，连日积压未画到者，至二更三点止，尚未完毕。夜写季弟信一件。是日已刻核改谢恩折二件。

### 初七日

早饭后清理文件。右脚偶尔疼痛，屈伸不能自由。至李眉生处久坐。旋见客四次。陈庆长系江苏候补知府，由浙江省城贼中逃出来，谈最久。写左季高信一件。中饭后，闻左调张樨园军，分二千人扎马金街，心以为虑。又写张凯章信一件。洪琴西来久坐。至眉生处久坐，与筱泉围棋一局。旋清理文件。夜复清理良久，至二更毕。接奉廷寄一件，催沅甫弟赴上海。睡甚能成寐。上床至四更方醒，五更又酣寝矣。老境中忽多美睡，岂顽健耶？抑昏惰耶？

### 初八日

早饭后清理文件。旋见客四次，雪琴来谈颇久。与柯筱泉围棋一局。凯章自湘乡来，与之久谈，即留在公馆住。清理各谢恩折共八件，校对一过，初十日将专差送京。清理文件，习字一纸。中饭后与眉生、莼卿等一谈，与凯章久谈。清理文件。夜写信，沈幼丹一件、李辅堂一件。写零字颇多，温古文二首。睡后，三更成寐，将明乃醒。接季弟信，知李与吾陆兵于初二日获一胜仗。

### 初九日

早饭后清理文件。旋见客五次，周寿山来久坐，罗少村、陈虎臣、刘养素坐亦久。午初出城接李希庵中丞，在厘金局等候甚久，申初始到。旋进城同至余寓，因与凯章、少荃同席，傍夕散。夜与希庵谈至三更，希即在余公馆内住宿。睡后不甚成寐，似因说话太多之故。

### 初十日

早饭后拜发万寿折。希庵与我同行三跪九叩礼。此次折差共赍谢恩折八个，又万寿折六个，余一、希庵一、雪琴一、马学使一、鲍军门江军门各一也。旋见客二次。已刻出门拜希庵，午刻归。见客二次。中饭后至李眉生处坐，与筱泉围棋一局。略清文件，不暇细看，盖将改折稿也。写零字颇多。倦甚，小睡。天气转寒，大风震瓦。夜改折稿二件，二更三点毕。清理文件。三更睡。

### 十一日

早饭后清理文件。旋改折稿一、片稿一。与柯小泉围棋一局。已正希庵来畅谈，至酉初方去。余因说话太多，倦甚，因在室中散步逍遥。夜清理文件。三日之内积压之事已多，至二更四点尚未完毕。睡不甚成寐。

### 十二日

早饭后清理文件。旋以忠义局第六案一折，请陈虎臣来帮同校对。校毕，发报二折、三片、一单。见客五次，又立见者六次。至李眉生处小坐。习字一纸。倦甚小睡。中饭请养素、张凯章。饭后，至眉生处坐。陈作梅来，旋希庵来久坐，至夜二更始去。清理文件。三更睡。昨日春雪，本日阴寒，至未刻后晴霁矣。

## 十三日

早饭后清理文件。习字一纸。与柯小泉围棋一局。见客五次。阅《文献通考·兵考》一卷。雪琴来久谈；未初来，申初去。希庵来畅谈。申正雪琴复来，共谈至一更四点始散。清理文件，温苏诗数首。本日渴睡殊甚，午正昏昏睡去，二更复思睡，倒床乃不甚成寐。前日写一扁，本日悬挂，乃甚不称意，盖三字中，两字作竖势，一字作横势，不能自成一律也。因悟作字之道，全以笔阵为主，若直以取势，横以出力，当少胜矣。

## 十四日

早饭后写家信一件、官中堂信一件。旋出门拜客，至希庵处久坐，又至马学使、李少荃处，至谷米局看湖北协济之谷，每石掀簸，得八斗八七升不等，午正归。见客二次。中饭后与筱泉围棋一局，清理文件。申刻写对联十余付。傍夕陈作梅来谈，至二更方散。写袁午桥信一件，约八百字。三更睡，不甚成寐。日内应复之信，经幕友具稿者，久未核定，废阁甚多，殊以为愧。

## 十五日

黎明，九弟自家来营。各文武贺望，兼九弟初到，应酬纷纷，直至午刻少息。核改信稿四件。中饭后，与九弟久谈。写左季高信。见客二次，赵惠甫坐颇久，希庵来久坐。写唐义渠、阎丹初信一。陪希庵谈至二更方散，又与沅弟谈至二更四点。睡不甚成寐。近日疮癣少愈，不甚痛痒，不知何故，岂湿气已尽除耶？

## 十六日

早起，与九弟畅谈。饭后见客七次，围棋一局，核改信稿三件。中饭后清理文件。写信，季弟一、雪琴一、多礼堂一片。剃头一次。王甥冠圭兴隍来久坐。灯后九弟归，畅谈至三更止。睡不甚成寐。日内因希庵、沅弟新到，应酬较繁，说话甚多，公事多废阁不办。

## 十七日

早起，与九弟谈。饭后，朱铁桥来，陈作梅来，与之畅谈。希庵旋来，久谈竟日，直至灯后方去；沅弟陪之久坐，余亦时陪时未陪。上半日见客四次，内少荃坐较久，留之便饭。下半日，小睡半时许。灯上，希庵去后，



与九弟畅谈至二更五点方散。因九弟有事求可、功求成之念，不免代天主张，与之言老庄自然之趣，嘱其游心虚静之域。

### 十八日

早饭后，与九弟畅谈圣贤成己成物、立人达人之道，言统带兵勇，不可存沽恩市德之意。旋见客三次，清理文件。已刻与筱泉围棋一局。又与蒋蕤卿等论次青之非。小睡片时。午初清理文件。中饭后又略为清理。沅弟申初来，希庵申正来谈，至二更方散。清理文件。三更睡。日内积压事件甚多，几不可爬疏矣。本日接家信，泽儿颇以年长学浅为惧，或进善之机耶？

### 十九日

早饭后，江苏委员厉学潮来，解饷八万两。少荃启行之途费有着，快慰之至。旋见客六次。清理文件。与筱泉围棋一局。午初九弟来畅谈，至灯后方散。清理文件，二更四点尚未完毕。睡颇成寐。是日风大作寒，俗所谓观音暴者。莫子偲自大通归，赠余以武英殿聚珍板《水经注》一部，亦余所购求而不得者。

### 廿日

是日堂期，早饭后见客四次。旋出门拜客。至九弟处，午初归。与柯小泉围棋一局。口唇微烂作痛。清理文件。中饭后，代希庵改折稿一件，又自改折稿一件。灯后改谢恩折稿二件，二更三点毕。用心太过，睡不甚成寐。

### 廿一日

早饭后清理文件。旋接家信，季弟妇邓宜人于初七日弃世。又接郭云仙、意城等信，言之甚详。九弟来，论季弟家事。旋见客三次。写季弟信一件。接奉廷寄二件。接沈幼丹信，言事甚详。中饭后，九弟仍畅谈一切，至申初始去。略清文件。杨朴庵送书院课卷来，一谈。傍晚希庵来，谈至二更散。清理文件。三更睡，甚能成寐。

### 廿二日

早饭后清理文件。旋作参李次青片奏一件。已初与沅弟同出东门城